

Na osnovu člana 70., stav 1. i 2. Zakona o organizaciji organa uprave u Federaciji BiH („Službene novine Federacije BiH“, broj: 35/05), a u skladu sa članom 6. stav (1) Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, broj: 44/12, 23/13, 27/14 i 36/19), Ministrica za socijalnu politiku, zdravstvo, raseljena lica i izbjeglice Bosansko-podrinjskog kantona Goražde, **d o n o s i:**

ODLUKU

o određivanju slobodne lokacije na području Bosansko-podrinjskog kantona Goražde
za 2026.godinu na kojoj se može osnovati apoteka

I

Ovom Odlukom utvrđuje se da ne postoje slobodne lokacije na području Bosansko-podrinjskog kantona Goražde za 2026.godinu na kojima se može osnovati apoteka (ustanova, ogranak i privatna praksa) u skladu sa demografskim i geografskim kriterijima utvrđenim članom 3. i 4. Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, broj: 44/12, 23/13, 27/14 i 36/19) (u daljem tekstu: Pravilnik).

II

Ova Odluka u 2026. godini se može mijenjati zavisno od promjene broja postojećih apoteka i njihovih organizacionih oblika.

III

Ukoliko u skladu sa tačkom II ove odluke, dođe do promjene broja postojećih apoteka i njihovih organizacionih oblika, osnivač buduće apoteke, odnosno budući nositelj odobrenja za privatnu praksu kojem je prethodno uručena odluka o saglasnosti na lokaciju i koja je preduvjet za pokretanje postupka odobravanja rada apoteke, dužan je podnijeti zahtjev za osnivanje/odobravanje rada apoteke s potpunom dokumentacijom, shodno važećem Pravilniku najkasnije 90 dana od dana dobijanja saglasnosti. Ovaj rok može se produžiti najduže za 15 dana u slučaju opravdanih razloga, koje cijeni voditelj postupka. U suprotnom se predmetna saglasnost stavlja van snage.

Ukoliko se uputi dva ili više zahtjeva za istu lokaciju ili prostor, Ministarstvo će odlučivati po zahtjevima onim redoslijedom kojim su podnešeni kompletni zahtjevi, s tim što će se odobriti samo po jednom zahtjevu.

IV

Za prostore koji su u vlasništvu općine oglašavanje slobodnih lokacija i izbor budućeg nositelja odobrenja za privatnu praksu, odnosno budućeg osnivača apoteke vrši nadležna služba općine na osnovu kriterija koji se odnose na:

- Potrebe stanovništva lokalne zajednice;
- Saobraćajnu mrežu;
- Položaj apoteke u odnosu na ambulantu;
- Dostupnost usluga buduće apoteke sa aspekta radnog vremena;
- Garanciju o pružanju usluga najmanje u periodu od 5 godina;
- Brzina stavljanja apoteke u funkciju;
- Zapošljavanje lica sa evidencije Službe za zapošljavanje BPK Goražde.

V

Nadležna služba općine će Ministarstvu dostaviti obavještenje o provedenoj proceduri oglašavanja i Odluku o izabranom budućem nositelju odobrenja za privatnu praksu, odnosno budućem osnivaču apoteke kome će Ministarstvo izdati prethodnu saglasnost za osnivanje apoteke.

Ukoliko se za apoteku osigura prostor na osnovu provedene procedure u skladu sa Pravilnikom o bližim uvjetima i postupku davanja u zakup kapaciteta zdravstvenih ustanova, kao i vrsta kapaciteta zdravstvenih ustanova koji se mogu dati u zakup na teritoriji Federacije BiH („Službene novine Federacije BiH“, broj: 28/12), Ministarstvo će izdati prethodnu saglasnost i bez oglašene slobodne lokacije.

Zdravstvena ustanova koja je provela proceduru davanja u zakup kapaciteta zdravstvene ustanove će Ministarstvu dostaviti obavještenje o provedenoj proceduri i Odluku o početku davanja u zakup jedinice zakupa na osnovu koje će Ministarstvo izdati prethodnu saglasnost za osnivanje apoteke.

VI

Podnosilac zahtjeva za davanje prethodne saglasnosti na lokaciju za osnivanje apoteke dužan je uz zahtjev Ministarstvu dostaviti i dokaz o vlasništvu ili zakupu prostora u kojem planira otvoriti apoteku, odnosno, ekvivalent dokaza o ugovornom odnosu sa vlasnikom prostora (ugovor, predugovor, sporazum i sl.).

VII

Ova Odluka se ne odnosi na usklađivanje poslovanja i verificiranje ispunjenosti uslova za nastavak rada već postojećih apoteka po važećim propisima koji regulišu ovu oblast.

VIII

Odluka stupa na snagu danom donošenja i ista će se naknadno objaviti u “Službenim novinama Bosansko - podrinjskog kantona Goražde” i na web stranici Vlade Bosansko-podrinjskog kantona Goražde www.bpkg.gov.ba.

**Ministarstvo za socijalnu politiku,
zdravstvo, raseljena lica i izbjeglice
Bosansko-podrinjskog kantona Goražde**

Broj: 08-33-194/26
Goražde, 30.01.2026.godine

